

ՎԱՀԱՆ ՄԻՆԱԽՈՐԵԱՆ

ԱՐՅԱԽԻՐՔԻ ՕՐԵՐ

VI

ՎԵՐԱԴԱՐՁԸ

Անցել էր երեւի մէկ կամ երկու ժամ, երբ բակում ոտնաձայն լսեց: Ելանք ու մէկ կողմ քաշւեցինք: Դուռը բացին. նոյն փոլիսն էր, Իբրահիմը, որ հրամայեց մեզ դուրս գալ: Գրեթէ միաժամանակ ախոռը մտաւ մի վտիտ ու այլանդակ թուրք: Զարմանքն ու շփոթութիւնը համակեց ինձ. դաճաճն էր՝ կոյսերի սայլապանը: Իսկոյն յիշեցի լուսաբացին պատահած դէպքը եւ մինչ ուղում էի պարզել ինձ համար, թէ ինչ ճակատագրական կապ կայ մեր եւ այս թշուառականի մէջ, որ նորից ցցւում էր մեր ճամբու վրայ՝ երբ փոլիսը սայլի մօտից յետ դարձաւ մի տրցակ բոլորովին նոր պարան ձեռքին եւ հրամայեց մեզ չոքել: Նա սկսեց մեր թեւերը կապկպել: Իր զսպած ատելութեան եւ դայրոյթի առարկան յատկապէս ես էի: Ծունկը դրած ուսիս՝ նա կատաղութեամբ քաշում, թոթւում, պրկում էր հանգոյցը, քթի տակ հայհոյանքներ տեղալով: Վերջապէս նա աւարտեց իր գործը ու, մէկ կողմ քաշւելով, կծու հեղնանքով ասաց.

— Հիմա ջանդ ազատիր տեսնեմ, թէ ինչպէ՞ս պէտք է յաջողիս, կոմիտէ բաշի՛:

Հասկացայ, որ ներշնչւած է...

Անասուած կերպով էր կապել եւ այնքան իրարու մօտ, որ հազիւ կարողացանք ոտքի ելնել: Գաճաճը ախոռից դուրս էր բերել ձին եւ լծում էր երկանիւ սայլը: Երբ աւարտեց եւ սայլը դարձրեց դէպի բակի դուռը, փոլիսը գոչեց.

— Հայտէ՛, ելէ՛ք սայլը:

Իրարու հրմշտկելով մօտեցանք, բայց մի կատարեալ տառապանք եղաւ վեր բարձրանալը: Սայլը սովորական սայլերից բարձր էր. երկուսով միասին, եւ այն էլ յետ պրկւած թեւերով, չէինք կա-

րող վեր ելնել: Միւս կողմից հնարաւորութիւն չկար որ նախ մեզանից մէկն ու մէկը անցնէր: Վերջապէս մօտեցաւ բակի մէջ անտարբեր կանգնած մեյրամաղձոտ ժանդարմը, որի օգնութեամբ ես ներս սողացի, քաշելով Գարեգինին: Այդ նոյն վայրկեանին, խուլ ճրճութեամբ ծոցիս մէջ մի բան փշրւեց: Հասկացայ, որ ակնոցներս ջարդւեցին: Ժանդարմը մեզ մօտ դրաւ Գարեգինի բակում մնացած կապոյրը եւ տեղ բռնեց դաճաճի մօտ: Սայլը շարժւելուն պէս պարզ եղաւ, որ քով քովի նստել չենք կարող: Թէ իմ եւ թէ Գարեգինի թեւերը ցնցումներէից, կարծես թէ, կտրտւում էին: Ես քիչ առաջ անցայ, իսկ Գարեգինը, դառնալով դէպի յետ, յենեց ինձ:

Թէ որ ուղութեամբ էին մեզ տանում, դժւար էր հասկանալ: Ամեն անգամ, երբ վեր էի առնում գլուխս, աչքս սաստիկ կծկւում էր: Բայց շուտով մեր պիմաց երեւաց խարխաւած արգիլարանը: Քիչ անց նա մնաց մեր յետեւը եւ մենք մտանք դաշտը ճեղքող մի ճամբայ: Առջեւում, դէպի վեր երեւում էր մեր քարանսարան: Հասկացայ, որ բռնել ենք աղջամուղջին մեկնած սայլերի ճամբան: Շուտով մօտեցանք քարանսարայի պատին, որի տակ լուսաբացին շարւած էինք բոլորս: Դիտարաց, ոտաբորիկ մի թուրք, բթամատերը գոտիի մէջ խոթած, նայում էր մեզ: Քիչ վերը, ճամբու ծայրին, մի դամբու ծուլօրէն դիտում էր ձին: Դունչն առաջ նետելով, նա յանկարծ բացեց բերանը, բայց հաջոցի ձայն չելաւ:

Ելանք խճուղին: Թւաց, թէ մեզ տանում են միացնելու գաղթին, բայց յանկարծ թեքեցինք դէպի աջ: Դեռ աստուծի մէջ, որքան երկարում էր մեր կեանքը, այնքան սկսում էի համոզւել, որ առաջին առիթով մեզ սպանելու միտք չունեն: Այժմ, երբ բռնեցինք Կապոյի ճամբան, հասկացայ, որ խնդիրը միայն պարզ սպանութեան մէջ չէ: Վերջիչեցի Ստեփան վերջին խօսքերը, փոխիս «կոմիտէ բաշին», բայց իրադարձութիւններից որեւէ եզրակացութիւն հանելը հնարաւոր չեղաւ:

Գաճաճը, թեւերը վեր – վար անելով եւ յետ ու առաջ բնկնելով, դղրդազին փախցրեց սայլը: Կարծես, թէ երեխայ է եւ փայտի ձի է քշում: Ու յիշեցի Բեյեգիէից Չախալլի անցած ճանապարհը, «սայլապանները», գլխացաւ... Բարեբախտաբար ցաւի ոչ մի նշան չկար. գլուխս միայն դմբում էր պարապ տակառի պէս:

Բաւական ճամբայ էինք անցել, երբ Գարեգինը յետ նայեց ու շնչաց, թէ Ստեփան, ժանդարմների պետը եւ փոլիսը ձիերով դալիս են մեր յետեւից: Հասան մեզ ու, թանձր փոշի բարձրացնելով, առաջ անցան: Քիչ վերը ժանդարմների պետն ու դոկթոր Սկին ձիերը

քառասմբակ քչեցին: Կարծես, թէ մրցման փորձեր էին անում: Գաճաճը հարայհրոցով ձին նստեց ու փախցրեց: Ըստ երեւոյթին, ուղում էր գոնէ փողիսին հասնել, որ բաւական յետ էր մնացել երկուսից: Բայց ձին գնաց, գնա՛ց եւ վեր ցցած դլուխը թափահարելով, գաճաճի հարուածների տակ ակամայ մէկ — երկու ոստիւններ կատարեց ու գոհացաւ միայն արագ քայլերով: Շուտով երեք ձիաւորները անհետացան մեր եւ նրանց մէջ տարածւած թանձր փոշու յետեւում:

Ճանապարհը նորից ամայացաւ: Կարծես թէ այդ լայն, փոշոտ խճուղին հաստատւած էր միայն հայերը տեղահանելու համար: Թէ՛ւ մի օր առաջ երբ անցնում էի այդ խճուղիով, աշխատում էի մտքիս մէջ նշաններ անել նրա վրա, բայց այժմ ոչինչ չէի կարողանում վերլիչել: Ձախ կողմից, բլրակների վրա, խորդուբորդութիւնների մէջ մերթ ընդ մերթ պատահում էին վայրի ծառեր, որոնց վրա թառած խոշոր, սեւ թռչունները, սայլի դղրդոցից անհանգիստ, ճախրում ու ապա իջնում էին բլուրների թիկունքում: Աջ կողմից տարածւում էին անմշակ դաշտեր: Ձին ընթացքը դանդաղել էր: Գաճաճը, ըստ երեւոյթին, ձանձրացել էր իր գործից. ձեռքը դրած ալտին, երգում էր այդ օրերին յատկապէս տարածւած «Մէմօ» սիրային երգը: «Ամա՛ն Մէմօ», «Էա՛տլը Մէմօ» — խոսքոտ ու ալանդակ ճիչերը բախում էին ուղեղս...

Ճամբու պտոյտներից մէկի ծայրին ուշադրութիւնս դրաւեց դէպի մեզ շարժւող մի զանգւած: Տարածւած փոշին խանգարում էր լաւ տեսնել ու թւաց, թէ ձիերի երամ է: Գաճաճը երգը ընդհատեց ու ցլեց նստած տեղը՝ բազէի պէս: Հայեր էին, գիւղացիներ, բայց թէ որ չըջանից, չգիտեմ: Դեռ մեզ չհասած՝ զանգւածը ճեղքեց: Սուրբադոյն մասը կանայք եւ երեխաներ էին: Վերջիները գողգուած ու գրեթէ մերկ էին: Կանայք, սակաւ հանդիպող տղամարդիկ, ցնցոտիների մէջ էին: Բեռ, անասուն, սայլ չտեսայ: Բոլորը, մէկ մարդու պէս, գետինը թնդացնելով գնում էին հա՛ գնում, կարծես թէ օր առաջ «տեղ» հասնելու անխախտ որոշումից դրդւած: Լաւ նայելու դէպքում՝ ամէն մարդ կարող էր նկատել, որ նրանք, թէեւ գնում են մէկ արագութեամբ, բայց տարբեր ձեւերով են քայլում. մէկը գլուխը առջեւ երկնցած, միւսը ուսի վրայ մէկ կողմը թեքած, ոմանք գլխիկոր, ոմանք խրոխտ, գմբէթաձեւ դիրքի մէջ, ոմանք կոյրի նման սեւեռուն, ոմանք էլ ցաք ու ցրիւ, անհաստատ: Ընդհանուր էր միայն մէկ բան՝ գնում են հա՛ գնում: Փոքրերից բացի, ոչ ոք, կարծես թէ, մեր սայլը չէր նկատում. մեզ պիչ — պիչ նայում էին զանգ-

ւածի յետեւից քայլող ձիաւոր երկու ոստիկաններ, մտրակների ծայրերը ծնկերին յենած :

Արեւն արդէն կախել էր դիմացի բլուրների վրա, երբ մենք մօտեցանք ինչ որ աւերակների: Անհաշիւ քանակութեամբ սեւ ու խոշոր թռչուններ ելնում էին աւերակների թիկունքի բլրազազաթներէից, առաջին պատահած ծառի վրա նստում, ապա, կամարածեւ շրջան տնելով, նորից իջնում էին բլուրների ստորոտը: Կարծես թէ նրանք էլ էին գաղթում: Ու ծանր էր օդը եւ այնքան հեղձուցիչ, որ գլուխս դառնում էր: Երեւի բաւական ժամանակ էր անցել, երբ հասանք մի կիսաքանդ վայր: Փլած խրճիթները, մարագները եւ ճամբու վրա ընկած խոշոր քարերը աղօտ կերպով վերականգնում էին մտքիս մէջ մի օր առաջ Կաւղայից անցած ճանապարհը: Պէտք է, որ շատ հեռու չը լինէինք քաղաքից: Կիսաքանդ, բլրածեւ մի շէնքից քիչ վար սայլը կանգ առաւ: Վերը, դէպի ձախ, մի քանի քայլի վրա շարքով կանգնած էին երեք թամբած ձիեր: Ուրեմն, Ստիկին, ժանդարմների պետը, փոխը դեռ այստեղ էին: Բայց ոչ ոքի չտեսայ: Մեղմաղձոտ ժանդարմը ձեռքով նշան արաւ, որ իջնենք: Գրեթէ միաժամանակ դաճաճը վազեց դէպի թամբած ձիերը: Ժանդարմը մեզ առաջնորդեց ճամբու վրա ընկած մի կիսաքանդ շինութիւն: Քանդած պահճօտ էր, ախո՞ռ, ձմերային մարտի, գո՞մ թէ ինչ՝ չգիտեմ: Այստեղ ու աշտեղ անհիմամ կուտակւած իէն փոշիացած աղբեր: Շէնքի մուտքը եւ յետեւի պատը դրեթէ կիսով չափ փլած ու գետնի հետ հաւասարւած էին:

Ժանդարմը տարաւ մեզ այդ երկար շինութեան մինչեւ կենտրոնը: Գարեգինը, կարծես թէ, ինքնամոռացութեան մէջ էր ու այնքան դանդաղ էր քայլում, որ ստիպւած էի լինում քաշել: Չարաչուք տը պաւորութիւն էր թողնում այդ շէնքը: Ժանդարմը պատի տակ կանգ առաւ ու նշան արաւ, որ նստենք: Աւելի քան մուսլ էր: Այդ վայրկեանին, գարմանալի է, ոչ մի մանրամասնութիւն չէր վրիպում աչքիցս: Գետնին յենած հրացանի կոթի ծայրը մէկ բթաչափ ելնում ու նստում էր: Թեւս պրկւած վիճակում ցնցեց: Գարեգինը ինձ նայեց, կարծես թէ ուղեց ձայն հանել: Բայց նոյն վայրկեանին ժանդարմը դարձաւ, յամրաքայլ յետ դնաց ու դուրս ելաւ շէնքից: Պատի տակ կկգած՝ Գարեգինը անընդհատ ցցւում էր առաջ ու վեր — վար նայում: Յանկարծ նա շնչահեղձ շնջաց.

— Փախի՞նք...

Բոլորովին այլայլւած նայում էր աչքիս մէջ.

— Կզգա՞մ, որ հիմա մեզ հոս պիտի սպանեն...

Նրա անհանգստութիւնը ամբողջապէս համկեց նաեւ ինձ ու ոչինչ չկարողացայ ասել: Բայց անմիջապէս երեւի ինքն էլ հասկացաւ, որ փախչելու ոչ տեղ կայ եւ ոչ էլ հնարաւորութիւն. դուրսը կախեց ու կարծես թէ հանդարտեց: Անցաւ մէկ — երկու վայրկեան եւ յանկարծ նա ցնցեց.

— Ա՛... բռնէն...

Իսկոյն նկատեցի մուտքից դէպի մեզ քայլող մէկին եւ բռնեցի Գարեգինին, որ լռի: Մտքերս, ինչ որ հրաշքով կարգի ընկած վիճակում, դատում, ճշդում էին արագ: Երեւի բնազդն էր ինձ առաջնորդում: Չերքեզի հագուստով մի բարձրահասակ մարդ, դանդաղ ու համաչափ քայլերով, դալիս էր դէպի մեզ: Նա ձեռքերը դարսել էր յետեւում: Դաշոյնը քայլի հետ հորիզոնաձեւ ձօճում էր: Ատրճանակի պատեանի բաց ծածկը, զարնած թռչնի թեւի պէս, թարթում էր: Գարեգինը ուղեց վեր կենալ, բայց ներքին մի թելադրութեամբ պահեցի: Իսկ երբ մարդը բոլորովին մօտեցաւ ու կանգ առաւ, ոտքի ելանք: Եկտրը անխօս նայում էր մերթ ինձ, մերթ Գարեգինին: Մի աներեւակայելի համբ տեսարան էր այդ, որ չա՛տ երկար թւաց ինձ: Բայց ահա մարդը դուրսը կախեց եւ դաշոյնը, դաստակից բռնելով, ծայրը ոտքերի մէջ առաւ: Դէմքը կնճռած նայում էր մեր ոտքերին: Ամենայն յատակութեամբ զգում էի, որ ոչ մի ձայն չպէտք է հանել: Յանկարծ նա դուրսը վեր առաւ ու թւաց, որ ուղում է բան առել: Եւ ես, որ մինչեւ այդ Գարեգինից աւելի ինքնագիտակ վիճակի մէջ էի, սկսում էի տեղի տալ՝ մարդու վրաս քարացած ու ծանրացած հայեացքի առջեւ: Բայց ահա նա նստեց, ապա վար առաւ գլուխը, նոյն դանդաղ ու համաչափ քայլերով գնաց դէպի վար եւ չէնքի միւս ծայրից դուրս դալով, անհետացաւ...

Թուլացել էինք ու գրեթէ վայր ընկանք պատի տակ:

Երեւի անցել էր մօտ մէկ ժամ, երբ յայտնեց ժանդարմը եւ առաճնորդեց մեզ սայլի մօտ: Թամբած ձիերը չկային: Գաճաճը այլեւս ոչ մի աճապարանք չէր արտայայտում: Ձին էլ կամք չունէր գնալու: Ժանդարմը արձանացած նայում էր մէկ կէտի: Մտքերս դեռ դառնում էին չերքեզի հագուստով մարդու շուրջը, երբ աջ կողմից, աւերակների մէջ, նկատեցի մի խումբ կացինաւորներ, որոնք նման էին աներ այցելող փայտահատների. նրանք նստած վիճում էին. մեզ տեսնելով մէկէնիմէկ սմբեցին: Աւերակների ծայրից երկարում էր նոյն լայն, փոշոտ ճանապարհը, որով անցել էինք մի օր առաջ, բոլորի հետ միասին: Ու մտքերս, չերքեզից անցնելով փայտահատներին եւ նրանցից տարագիրներին, նորից սկսում էին շփոթւել...

Բաւական ժամանակ էր անցել, երբ մեր դիմաց, ճամբու բովանդակ երկարութեան վրա, նշմարեցի մարդկանց ահադին բազմութիւն: Նեղ շերտով, ճամբու ձախ եզրի ուղղութեամբ, բաւական մեծ տարածութեան վրա նստած էին անհաշիւ մարդիկ: Գիւղացի տարազերներ էին: Յանկարծ յիշեցի Չախալիից դուրս մեզ պատահած Չարչամբայի շրջանի գիւղացիներին... Եթէ նրանք են, փոխւած են: Ու ոչ հորթ, ոչ կով, ոչ եզ, ոչ բեռներ չկան այլեւս: Եւ ինչո՞ւ այնտեղ են նստել ու ոչ թէ քիչ վերը՝ աւերակներում, որ ոտքով հազիւ մէկ ժամայ ճամբայ է... Սարսուռը ցնցում է ինձ... Մեծ մասամբ կանայք, երեխաներ, բայց կան նաեւ բաւական թւով տղամարդիկ: Առաջինները, տեսնելով մեզ, կայծակնաձար նայում են, բայց գեղջկուհիներէից ոմանք ամաչելու ձեւով երեսները դարձնում, կամ ծածկում են ձեռքերով: Մէջ ընդ մէջ պատահող տղամարդիկ, երբ նրանց հաւասարում էինք, դուրսները կախում էին: «Ձեն տեսել», «չգիտեն» — այսպէս էր նրանց ընթացքը: Այս շարքի ծայրին, բաւական մեծ ընդմիջման վրա, կար տղամարդկանց մի ստւար խումբ: Դեռ երիտասարդ մարդիկ էին: Բոլորի թեւերը պարանով կապկաւած միացւած էին: Երբ հաւասարեցինք, սրանց մէջ իրարանցում, խլրրտոց, շարժումներ եղան. մէկը մինչեւ իսկ, ըստ երեւոյթին, մոռանալով, որ կապւած է, փորձեց վեր կենալ ու մօտենալ մեզ, բայց ընկաւ:

Աւելի վար սկսում էր մի երկրորդ շարք. սրանք բացառապէս երիտասարդ կանայք, աղջիկներ ու փոքրիկներ էին: Դժւար է նկարագրել այս տեսարանը: Մեռելաթաղի հաւաքւած կանանց նման էին: Ոմանք շարունակում էին լալ, ոմանք, մեզ տեսնելով, լացը ընդհատում, նայում էին. ոմանք էլ բռնում, յետ էին քաշում փոքրերին: Արդեօք վերը կապւած տղամարդիկ սրանց ամուսիններն էին, թէ առաջին շարքից դատւած երիտասարդներ, չգիտեմ: Մի գեղջկուհի ինչ որ բան է ասում երեք — չորս տարեկան աղջնակին, որ գրեթէ մերկ, բզբւած չապիկով կանգնած, ոստի պէս դողալով, նայում էր մեզ ու շուրթերը դժողոճութեամբ ուռցնում: Առջեւ ընկած Գարեգինի կապոցից դժւարութեամբ դուրս քաշեցի մի կտոր հաց՝ աղջնակին նետելու համար, բայց սայլը անցաւ եւ ես ուշացայ: Քիչ փարը մի կին, իր տղեկի մօտ նստած տեղից կիսով չափ վեր ելած ու դունատ դէմքի վրա սեւ, մեծ աչքերը լայն չռած, բերանաբաց նայում էր: Ես հացը նետեցի փոքրիկին, որից նա սարսափելի վախեցաւ, ճչաց ու, մօրը գրկելով, պահեց: Ու թէեւ գաճաճը ձին յանկարծ փախցրեց, բայց տեսայ, պարզ տեսայ, թէ ինչպէս կինը հա-

ցի վրայ խոյացաւ: Նա էր, թէ նա չէր... Այն փոքրիկ տղեկի դեռուտի մայրը, որին պատահեցինք Կարադաղի սարի տակ, չգիտեմ: Ու դէմքեր, անհաշիւ դէմքեր... մա՛նչ, կի՛ն, մե՛ծ, փո՛քր... կիսատ — պուտ դէմքեր... քի՛թ, գլո՛ւխ, ախա՛նջ... Ու մի աչք սեւեռաբիւր, կարծես թէ, գլտորւում էր սայլի հետ զուգահեռ...

Սթափւեցի: Բայց փոխնիփոխ այրւում եւ մրսում էի: Դիմացը մայր մտնող արեւի թեք ճառագայթները հորիզոնում կազմել էին վարդագոյն շերտեր, որոնք վերէն — վար չիթ — չիթ դեղնելով, տըժգունում էին ու մոխրանալով չքանում: Աջից եւ ձախից այժմ պատահում էին արտեր, բանջարանոցներ: Մի գիւղացի դաշտից աճապարանքով դառնում էր: Ուսին դրած բահի վրա ուշ մնացած մի ճառագայթ էր խաղում...

Մթնեց: Սայլը թէեւ դղրդում էր, բայց, կարծես թէ, չէր գնում: Գաճաճը անվերջ մտրակում էր ձին ու մերթ ընդ մերթ նրա հետ վէճի մէջ մտնում: Մթութեան մէջ, դէմս նստած Ժանդարմի ցից սևինից զատ՝ ուրիշ ոչինչ չեմ տեսնում: Ջարդել էի իսպառ, ոտքերս երկարելու տեղ չկար, իսկ ծալած վիճակում յարատեւ մնալը դժարանում էր: Նստած տեղս, կարծես թէ, քնում, արթնանում էի: Ճամբու վրա ծալած տարագիրները այժմ ինձ պատկերանում էին աւերակների մէջ: Ու, որպէս թէ, մայրը շտկում է աղջնակի վեր բարձրացած շապիկը եւ ասում.

— « Աղօթի՛ր »:

Եւ աղջնակը, դժգոհ դէմքով, ցցում է շրթունքներն ու ասում.

— « Մա՛յր, չէ՛ որ ես աղօթել չիտեմ »:

— « Ըսէ՛, աղւորս, Հա՛յր մեր... »

— « Հա՛յր մեր:

— « Որ յերկինս ես... »

— « Որ յերկինս ես:

— « Սուրբ ըլլայ Քո անունը... »

— « Սուրբ ըլլայ... »

— « Ըսէ՛, Քո անո՛ւնը... »

— « Ըսէ՛, Քո անո՛ւնը... »

Յանկարծ դուլխս դարձաւ ու նստած տեղս կքցի...

— Վահա՛ն... »

Բոլորովին մոռացել էի Գարեգինին: Ու մտքերս բուռն թափով

նրանից անցան կնոջը, Արմենակին, Պարունակին, Տիգրանին, բոլորին: Ո՞ւր են, արգեօք, հիմա:

— «Ամասիայի կիրճի այն կողմը» ... Անհնարին է:

— «Ամասիայի կիրճի այս կողմը» ... Թերեւս:

— «Ամասիայի կիրճի մէջ» ... Զգիտե՛մ:

Վեր վար թառած տների միջից մերթ ընդ մերթ առկայծում էին լոյսեր: Քաղաքի վարի մասերում, մի մռայլ շէնքի առաջ, սայլը կանգ առաւ: Մի ծուռ լապտեր լուսաւորում էր մայթը: Մուտքի մօտ կանգնած էր մի պահակ: Վար իջանք ու միջանցքից անցնելով մըտանք մի գետնայարկ պատշգամբ, որի անկիւնում կախւած էր թիթեղեայ մի ճրագ: Դէպի ձախ, մեր դիմաց բացւում էր մի դուռ, որից ներս մտաւ ժանդարմը ու, մի երկու վայրկեան յետոյ դուրս գալով, մեզ ներս տարաւ:

Միջին մեծութեամբ մի սենեակ էր. երկու դրասեղան, մի քանի աթոռներ, պատից կախւած ինչ որ մարդկանց պատկերներ եւ մէկ թաւշապատ երկար ու լայն բազկաթոռ, որ չէր յարմարւում մնացած կահաւորման: Դէպի աջ, սենեակի խորքում, դրասեղաններից մէկի առջեւ, նստած էր կանացի դէմքով մի երիտասարդ պաշտօնեայ եւ ճրագի տակ դարձնում էր ինչ որ թղթեր: Մեզ տեսնելով, նա մէկ կողմ հրեց թղթերը եւ այնպիսի դիրք ընդունեց, որ կարծես թէ օդի պակասութիւնից նեղւում էր: Ապա թղթերը իրարու վրայ դարսելով, ելաւ ու մի պահ մտածեց: Ուզում էր, երեւի, բան մտաբերել: Այո, նա վարանքով մօտեցաւ դարակին, մի հաստ մատեան դուրս քաշեց եւ արհեստականօրէն բամբ ձայնով, հարցնելով մեր անունը, ազգանունը, բնակատեղին, պաշտօնը, ծննդավայրը, արձանագրեց: Զարմանքով նայեց ինձ, երբ ասացի, թէ պարսկահայտակ եմ. մի քիչ մտածեց, բայց դրեց: Աւարտելով գործը, մօտեցաւ ու փորձեց մեր թեւերը քակել: Ապարդիւն, իր ձեռքերի գործը չէր այդ: Երբ փորձերը անյաջողութեան մատնւեցին, սրտնեղեց: Ապա աւելի ու աւելի ջլջանանալով, սկսեց կապողի հասցէին ամէն տեսակ հայհոյանքներ ուղղել: Վերջապէս դրդուած՝ դուռը բացեց ու անհամբեր ձայն տւեց.

— Սադը՛կ, Սադը՛կ...

Ներս մտաւ փոքր ու սուր դէմքով, կարճահասակ մի մարդ, որ մեծ մկան նման էր: Նա, մէջքից վեր դէս ու դէն ճօճւելով եւ ինձնից Գարեգինին ու նրանից ինձ անցնելով, սկսեց մեր կապերը քաշ-քշել: Ոչ մէկ արդիւնք: Առաջարկեց որ կկղենք եւ սկսեց Գարեգինի

թեւը վեր վար դարձնել: Սակայն գործը «Ջամբազութեան» բնոյթ էր ստանում, առանց որեւէ հետեւանքի:

— Կտրի՛ր, գոչեց անհամբերութեամբ պաշտօնեան:

Բայց մկնադէմը, ըստ երեւոյթին, խնայում էր պարանը: Վերջապէս Գարեգինի թեւերը քակեց եւ դիւրութիւն ստացաւ նաեւ իմ կապերը թուլացնել ու արձակել:

— Տա՛ր, գոչեց պաշտօնեան:

Գետնին բրեթէ հաւասար անկիւնածեւ պատշգամբի միւս ծայրին կանգ առանք: Մկնադէմը, բանալիների տրցակի միջից մէկը զատելով, մի հաստ դուռ բացեց ու, ներս անելով մեզ, կողպեց: Մի աննկարագրելի դարչահոտութիւն մէկէնիմէկ չլսեցրեց ինձ: Մթութեան մէջ խարխալելով մէկ — երկու քայլ արի եւ յանկարծ ոտքս ինչ որ բանի հանդիպեց ու վայր ընկայ: Գրեթէ միաժամանակ, դըրսից, երկաթապատ պատուհանի եզրին մի ճրագ երեւաց: Մկնադէմը՝ սուր, թափանցող աչքերը կոպերի միջից դուրս նետած՝ վանդակի միւս կողմից շեշտակի նայում էր...

Կաւղայի բանտն էինք: Բանտասենեակը ցեխի, կեղտի, դարչահոտութեան մէջ թաղած փոքր ու ցած մի որջ էր: Հողի յատակի մէկ անկիւնում կար կեղտից սեւացած մի սափոր, որ սովորաբար գործ են ածում նամաղի համար: Յատակը այդ մասում ցեխ էր: Սենեակի մէջտեղը եւ պատի տակ ընկած էին խոտի պարկեր: Վանդակապատ բաց պատուհանը, որի տակ նստել էի, երկու — երեք քայլի վրա նայում էր սեւացած, բարձրադիր տախտակապատի: Որջի մէջ, դէս ու դէն ընկած խոտի պարկերը եւ գետնի մէկ մասի թարմ ցեխը մատնում էին, որ դեռ այսօր նրա մէջ մարդիկ են եղել: Հազար ու մի ենթադրութիւնների մէջ էի, թէ ովքեր կորող էին լինել: Եւ յիշում էի բոլոր նրանց, որոնց ոչ մի տեղ չպատահեցի՝ Երւանդ Խանէդանեանին, Հայկ Խրիմեանին, Տիգրան Քիւրքչեանին, Գեր Մեկընին եւ ուրիշ շատերին...

Գարեգինը մօտս կանգնած նայում էր մերթ ինձ, մերթ որջի պատկերին: Երեւի զգաց, որ անզօր եմ այլեւս «դրութիւն» ճշդելու: Նա մէկ ձեռքով բռնած իր կապոցը, միւսով դարձնում էր խոտի պարկերը ու զննում: Երկու հատ զատեց ու պատուհանի մօտ քաշելով, սկսեց կարգաւորել: Վերջացնելով իր գործը, առաջարկեց, որ պառկեմ: Մեր բախտի ճամբու վրա «աւազութեան» աստիճանը այժմ, կերեւի թէ, նրանն էր: Քնե՛լ, այդ էր միակ ցանկութիւնս: Բայց աչքս չէր թողնում: Թմրութեան մէջ լսում էի, թէ ինչպէս Գարեգինը, պատուհանի մօտ կանգնած, մկնադէմին չքմեղանքով բա-

ցատրում է, որ հիւանդ եմ եւ խնդրում է մաքուր ջուր բերել, որ աչքըս լայ: Մինադէմը խնդիրը կատարեց: Գարեգինը, փոքր անձեռոցիկներէից մէկը թրջելով, զգուշութեամբ մաքրում էր բորբոքած աչքըս եւ միւսով սրբում: Վերջապէս աւարտեց գործը ու աջ կողմից տեղ բռնելով պառկեց եւ մնաց անշարժ: Բաւական ժամանակ էր անցել, երբ նա մէջըով դարձաւ դէպի ինձ ու, կարծես թէ, քնեց: Խոր, անթարթ գիշեր էր: Մեզ շրջապատող դարչահոտութիւնը չէի զգում այլեւս: Բայց օդը կանգնած էր եւ բնականոն չնչնու համար՝ անբաւարար: Այնքա՛ն լուռ էր բանտը, որ կարծես թէ այդ խոշոր շէնքի մէջ վերէն — վար մարդ չկար: Որքան ժամանակ էր անցել՝ չգիտեմ: Յանկարծ թւաց ինձ, թէ թրթռուն սրնգի ձայն եմ լսում: Այո... Բիւշ չանցած նւագին զուգորդեց հնչուն ու դուրեկան երգի ձայն:

«Զեմա՛նընդա բէ՛նի օ՛լուր բիւ գիւն, հէլբէք արա՛րսան»...

Թրքական բանտում արգելափակւածի սրբազան իրաւունքն է օրւայ ու գիշերւայ ուղած ժամին երգել: Եւ սկսյա՛ն, կարծես թէ, երազ էր: Հայկի սիրած երգն էր այդ. «ուդ»ի լարերը բեկբեկելով, մեծ զգացմունքով էր երգում նա այդ երգը. այնտեղ, ընդարձակածաւալ պարտէզի այն մասում, ուր գետնին ամրացւած էին կանանչաներկ մի սեղան եւ երկու զուգահեռ նստարաններ: Եւ երգում էր այնքա՛ն զգացւած, որ յաղթանդամ Ասլանը հաճոյքից թափահարում էր շրջթան ու դունչը դնում թաթերին: Մեծ հորթի չափ էր այս շունը եւ զարհուրանք էր ազդում բոլորին: Հայկը նրան լիաթոք հպարտութեամբ ասում էր. — Ասլա՛ն...

Եւ բարեկամները Հային փողոցում պատահելով նրան՝ կատակով ասում էին. — «Ասլա՛ն»... Յերեկը, չղթայակալ բակում նրստած, նա հալածում էր ճանճերին: Իսկ երբ մթնում էր, նրան տանում, կապում էին նստարանների մօտ, պարտէզում: Ուշ գիշերին Ասլանը ազատութիւն էր ստանում: Այն ժամանակ նա ցատկում էր պարտէզի բարձրադիր պատը, ու լուսնոտի պէս սեւեռաբիր, քայլում էր բոլոր պատերի վրա: Խանդանեանը, որին մի անգամ ահաբեկել էր Ասլանը, վաղուց արդէն գիշերը եկեղեցու բակով չէր անցնում: Իբր թէ, Ասլանը միշտ կանգնած է լինում պարտէզի վարի պատին եւ այնտեղից նայում է, երբ ինքը գնում է տուն: Ու յիշում եմ, թէ ինչպէս մի օր, երբ Ասլանը, չղթան թափահարելով, փաղաքօրէն մօտեցաւ հոտոտելու Հայկի թեւը մտած Երևանդին, նա յանկարծական մի ցնցումով վեր հանեց ոտքը եւ գոյնը նետելով շնջաց:

— Շուն է, չի գիտցւիր, կը նայիս, կը խածնի...

Անյայտ բանտարկեալը սրտապատառ երգում էր.

«Բէնի՛, բէնի՛ բի՛ր գիւն օ՛լուր, հէլբէք, արա՛սան»...

Ո՛վ պիտի փնտռի այս իրարանցման մէջ քեզ, մա՛րդ...

Զարմանալի է, որ մինչեւ այդ մօրս բնաւ չէի յիշել...

Վերջին անգամ, Բագլի բանտում, մեր Սիբիր մեկնելու առաւօտեան, որից մի քանի օր առաջ Խոսիսոսուկում մայրը գիշերը վրան նաւթ լեցնելով այրւեց ու ածխացաւ, մայրս, տեսակցութեան պահին, ինձ ասաց.

— Զկարծես թէ ես էլ Վասակի մօր պէս...

Ու ես սացի, թէ չեմ կարծում:

Իսկ երբ ես զարմացած նայում էի, թէ ինչու, տեսակցութեան պահը լրանալուն պէս, այնքա՛ն աճապարանքով հեռացաւ, նա յանկարծ յետ նայեց ու ձեռքը վեր հանելով ասաց.

— Զկարծես, հա՛...

Մկնադէմը սլալացող աչքերով ճրագի մօտից նայում էր: Միւս աչքս էլ կիսով չափ դոցելով, արտեւանունքներիս միջից զննում եմ: Որքա՛ն նման է այս մարդը առասպելական մուկի: Մեզ լաւ նայելու համար, դռնը կցկտուր շարժումներով ցնցում է. — «Այո՛, այո՛, քնած ենք»... Զբացա՛ւ. կարծես, թէ գետինը մտաւ... Վստահ էի, որ պատուհանի եզրից նորից պէտք է դուրս հանի դռնը... Ու աչքս մնացել էր լոյսի լեզակին դամաւ... Մէկ կողմը վեր, միւսը վար ու մէջտեղը պարապ... Արբած կիսալուսին է կարծես... Սուղող օձի լեզու... Նաւթ չկայ, ճրագի մէջ նաւթ չկայ... Բայց յանկարծ լոյսը շտկւեց ու սլալալով ճառագայթեց... Սիրտս ուժգին բաբախում էր... Ու մտածում եմ, առնեմ, վրաս թափեմ նաւթը, այրւեմ ու վերջանամ... Ու ողջ էութիւնս, բազմահազար լեզու առած, ամէն կողմից ասում է. «ա՛ռ, ա՛ռ, ա՛ռ... նաւթը վրադ թափիր, այրւիր ու վերջացիր»... Մէկ քայլ էր միայն ինձ բաժանում ճրագից. անշըշուկ ելայ... Աչքի չափից շատ պարզ էր, որ ճրագը մի քիչ թեթելով կարելի է պատուհանի վանդակից ներս առնել... Ու, յանկարծ.

— Ի՞նչ կա... ա՛...

Զեռքս մնաց ճրագին... Գարեգինը թեւս բռնած հագիւ հազ չընջաց.

— Ի՞նչ կրնես...

Հարցումը ինձ այնպիսի՛ չփոթութեան մատնեց, որ ինչ ասելս չիմանալով, մեքենաբար չընջացի.

Ես ուղղում եմ առնել, նաւթը վրաս թափել, այրւել ու վերջանալ...

Գարեգինի շրթունքները դողացին ու դէմքին ձեւաւորւեց յանդաւոր մանկան մի ժպիտ:

— Դո՛ւ... ատանկ կըսես, որպէսզի փորձես, թէ որքան ես դիմացկուն եմ, չէ՞...

Կարծես թէ սլաղ ջուր մաղեցին գլխիս...



Լուսարացին տաքութիւնս մեղմացաւ: Տախտակապատի միւս կողմից լսում էին ձայներ: Ըստ երեւոյթին բանտի բակն էր: Դուրսը արդէն արեւ կար, երբ Մկնադէմը դուրս հանեց եւ մեզ: Միջանցքից անցնելով, մտանք դրասենեակի փոքրիկ բակը, որից դէպի ներս մի դուռ տանում էր բանտի բակը: Մուտքի դէմ եւ ձախ կողմից բարձրանում էր վանդակապատ պատուհաններով երկյարկանի շէնքը: Աջ կողմից երկարում էր բարձր ու հաստ պատ, որից մէկ — երկու քայլ դէպի ներս աղբիւր կար: Ջրի մօտ ընկած էին ծալծլած ամաններ ու մի դոյլ: Անտես առնելով աչքիս կծկծոցը, գլուխս օճառով լացի եւ քաշւեցինք մէկ կողմ, մուտքի մօտ: Նոր նկատեցի, որ՝ հակառակ բանտի մեծութեան՝ բակում գրեթէ մարդ չկար: Պատի տակ, մեր դիմաց, մի թուրք կկրած բռի մէջ հացի միջուկ էր տրորում: Քովնտի նստած մի գիրուկ թուրք, որի շրթունքները, կարծես թէ, խածել էր մեղուն, կենտրոնացած, համրիչ էր դարձնում: Քիչ վերը կիսամերկ մի ուրիշը, դէմքը ծամածռելով, չապիկի մէջ միջատ էր որոնում: Բակի խորքում, շէնքի դիմաց բարձրացող միակ ծառի տակ նստած էր մի խումբ, որ մերթ ընդ մերթ աղմկում, լռում էր: Երեւի խաղում էին: Շէնքի ձախ կողմի պատուհաններից երբեմն լսւում էին բացականչութիւններ, որոնք, երեւի ուղղւած էին մեզ: Հազիւ մի քանի վայրկեան էր անցել, երբ ծառի տակ բանտարկեալները շատացան եւ նստածների հետ միասին եկան դէպի մեզ: Թիկնեղ մէկը, որ առաջնորդում էր բոլորին, հարց տւեց.

— Ուլքե՞ր էք:

— Բանտարկեալներ, խուսափուկ պատասխան տւի ես:

Հարեւանին նայեց եւ ծաղրածու մի ձեւով աչքը թարթեց:

— Ե՞րբ եկաք:

— Գիշերը:

— Ո՞րտեղից:

— Ելէւիից:

— Ի՞նչ միլիտ էք:

— Հայեր ենք...

— Փա՛հ... աշխարհում դեռ հայ կա՞յ :

Նայում եմ դէմքին եւ զգում եմ, որ ընդհարումը անխուսափելի է... Բայց յանկարծ նրա ծաղրածու դէմքը մեղմ ու խնդրական արտայայտութիւն է ստանում .

— Փարա վա՞ր...

Եւ մօտեցայ մօտքին եւ կանչելով Մկնադէմին խնդրեցի, որ մեզ յետ տանի բանտասենեակը : Բակից դուրս գալուն պէս չօշափեցի դռտուս կարը . դրամները, որոնց մասին մինչեւ այդ մոռացել էի, այնտեղ էին : Ներսը դողում էի եւ միաժամանակ սկսում էր տաքութիւնս : Կատարեալ դժբախտութիւն . մեռնելուց աւելի՛ քիչ էի վախենում, քան հիւանդ լինելուց : Ինչ վիճակի մէջ էր Գարեգինը՝ չեմ յիշում, բայց գրեթէ միշտ զբաղւած էր ինձով : Իսկ այդ ինձ, նամանաւանդ գիշերւայ դէպքից յետոյ, աւելի էր ընկճում : Նա չարունակ ասում էր, որ պէտք է մի բան ուտեմ, կազդուրւեմ, բայց ես ոչ ախորժակ ունէի, եւ ոչ էլ նա ուզում էր տալ կապոցի մէջ մնացած հացն ու ապուխտը .

— Հէ՛չ մանր դրամ չմնա՞ց քովդ...

— Չմնաց :

— Պէտք է դուրսէն մածուն բերել տալ, բայց ես ալ մէկ փարա չունեմ, ամէն բան Ռեբեկային քով մնաց...

Ու լռեց : Նորից կնոջից բաժանւելու խնդիրը, որ ինձ չարչարում էր, ցցւեց մտքիս մէջ : Մտածեցի, որ պէտք է Գարեգինի մօտ դրամ թողնել եւ սկսեցի քանդել կարը : Բայց հազիւ աւարտեցի եւ դուրս քաշեցի դատ կարւած երկու թղթադրամները, երբ յանկարծ դուռը շրխկոցով բացւեց ու ներս մտաւ Մկնադէմը : Դժւարութեամբ արտասանելով Գարեգինի անունն ու ազգանունը, ասաց, որ կանչում են գրասենեակ : Գարեգինը ելաւ, բայց վարանքի մէջ էր . թւաց, թէ ուզում է բան ասել, բայց յանկարծ առաւ Ֆէսը ու դուրս գնաց : Այնքան արագ կատարւեց այդ, որ չկարողացայ անմիջապէս ինձ հաշիւ տալ եւ միայն դուռը փակւելու վրա հասկացայ, որ գնաց : Դողը ինձ տիրեց ու զանազան ենթադրութիւնների մէջ ընկայ : Իսկ երբ տեսայ բռիս մէջ ճմլւած թղթադրամները, բոլորովին չփոթեցի .

— Սաղը՛կ էֆենդի, Սաղը՛կ էֆենտի՛...

Մկնադէմը միջանցքի միւս ծայրից արագ մօտեցաւ պատուհանին .

— Ի՞նչ կայ...

— Սաղըլի էֆենդի... քեզ մէկ մէջիդ կը տամ, եթէ ասես, թէ ինչ եղաւ ընկերս...

— Այնտեղ է, էֆենդի, միւտիւրի մօտ:

— Ինչո՞ւ կանչեցին...

— Ալլահը վկայ, չգիտեմ:

— Սաղըլի էֆենդի, քեզ երկու մէջիդ կը տամ...

— Ալլա՛հը քեզ թող օգնի...

— Բայց պէտք է ընկերոջս հետ տեսնեմ:

— Հիմա կը դայ, էֆենդի:

— Իսկ եթէ՞ ուրիշ բանտասենեակ տանեն...

— Տանողը ես չեմ, ուր էլ ասեն տար, առաջ ալստեղ կը բերեմ:

— Մարդու խօսք...

— Հէ՛չ հոգ մի անի:

Քիչ հանդարտեցի, բայց շատ երկար թւաց ինձ Գարեգինի բացակայութիւնը եւ արդէն կասկածում էի թէ յիտ կգայ, երբ միջանցքից ոտնաձայներ լսեցի: Նրանք էին եւ ուղղակի մօտեցան պատուհանին: Գարեգինը յուզւած, չփոթւած, բայց եւ ինչ որ մի այլ վիճակի մէջ էր:

— Արձակեցին, քիչ ետքը պիտի մեկնիմ... Կըսեն, թէ հոս սամսոնցիներու խումբ մը կայ, որ շուտով պիտի ճամբեն... Յոյս ունեմ վաղը կամ միւս օրը Ռեբեկային հասնելու...

Մի անխառն ուրախութիւն մէկէնիմէկ համակեց ինձ եւ մինչեւ այդ ապրած դառնութիւնները երազի պէս չքացան: Բայց յանկարծ մէջս կասկած ծագեց:

— Այդ ամէնն իրա՞ւ է...

— Այո՛, ի՞նչ է, — արթնութեամբ ասաց Գարեգինը, — պաշտօնեան շատ մեղմ ու քաղաքավարի բացատրեց, որ իմ ձերբակալութիւնը թիւրիմացութիւն է եւ ազատ եմ ամենուն պէս դաղթելու:

— Փա՛ռք Աստուծոյ, ձեռքդ տո՛ւր:

Ու բոլի մէջ դրի ճմլւած երկու թղթադրամները: Գարեգինի աչքերը ջրակալեցին, բայց իրեն հաւաքեց եւ ասաց.

— Լսի՛ր, մինչեւ Ռեբեկային հասնիլս՝ ինձ մէկ մէջիդ լիուլի կը բաւէ:

— Խենթ ես, ինչ ես, չէ՞ որ ես դեռ երեք ոսկի ունեմ:

— Այո, բայց ինչ գիտնամ, թէ մինչեւ ե՞րբ պիտի մնաս հոս...

— Վստահ եմ, որ ինձ էլ շուտով կ'արձակեն ու կը հասնեմ ձեզ:

— Խօսք տուր, որ ամէն կերպ քեզ պիտի խնայես...

— Պատուոյ խօսք:

Մ'կնադէմը վար նայելով շշնջաց .

— Չափո՛ւկ, չափո՛ւկ, եթա՛ր...

— Հիմա, եթէ կուզես, որ հանգիստ սրտով մեկնիմ, պէտք է, որ մէկ թուղթը յետ առնես...

Ըստ էութեան, կարծես թէ, նոր հասկացայ, որ բաժանում ենք .

— Շատ լաւ...

Գարեգինը, վանդակից դուրս ընկած, ձեռքս համբուրում էր ու անձայն հեկեկում...

Ոտնաձայնը միջանցքում վաղուց էր մարել, իսկ ես դեռ կանգնած էի պատուհանի մօտ, չփոթ մի վիճակի մէջ եւ չգիտէի, թէ եղածը լա՞ւ էր, թէ վատ: Բայց եւ այնպէս մի անբացատրելի ուրախութիւն համակել էր ինձ: Մի պահ մինչեւ անգամ պատկերացաւ ինձ, թէ ինչպէս Գարեգինը հասնում է Ռեբեկային եւ միւսներին... Բայց, երբ յետ դարձայ եւ Գարեգինի պարկի վրա տեսայ նրա կապոցը, չփոթութիւնս սաստկացաւ...

Քիչ — քիչ սկսում էի հասկանալ, որ Գարեգինը մահաւան ճամբու մէջ մտաւ: Մնում էր պարզել այն հարցը, թէ երբ տեղի կունենայ այդ՝ նախ քան Ռեբեկային հասնե՞լը, թէ յետոյ: Եւ ամենից կարեւորն էլ, կարծես թէ, այս էր: Ծանր, չըջահայեաց եւ զգոյշ, թւում էր թէ ես գնում եմ Գարեգինի հետ դէպի էլէւի... Ու դեռ աւերակներին չհասած, ամէն բան հասկացայ...

— Ի՛հ, կարող եմ ասել, որ աւելի քան հասկացայ: Զգիտեմ միայն՝ վստա՞հ էր արդեօք «Ռեբեկային հասնելու», թէ մի խօսք էր, որ ասաց ինձ սրտապնդելու համար...

Ու, կարծես թէ, Ստիկին պաշտօնատան մէջ ինձ հարցաքննում է .

— «Պատմի՛ր տեսնեմ, թէ ի՛նչ որոշեցիք էրզրումում», ասում է նա մտրակը ճոճելով:

— «Էրզրումո՞ւմ», ասում եմ ես, «այդ անցա՛ծ բան է»...

— «Անցա՞ծ», դռչում է նա:

Ու երբ ես դրականապէս թօթւում եմ գլուխս, նա բռունցքը իջեցնում է բերանիս ու ես, վար ընկնելուց խուսափելով, նստում եմ: Լեզուս բերանիս մէջ շարժելով հասկանում եմ, որ առջեւի ատամներս փշրեցին: Հաւաքելով փշուրները, թափում եմ ափիս մէջ. արիւն է, մուգ թանձր արիւն:

Այն ժամանակ Ստիկին կատաղութեամբ ճօճում է մտրակը ու դռչում .

— « Բեզ, շան պէս ծեծելով, կը սատկեցնեմ, եթէ չասես, թէ ինչ արիւր զէնքերը » :

— « Զէնքերը », շինծու զարմանքով ասում եմ ես...

— « Այո', զէնքերը », գոչում է Ստէկին, ձեռքերը գրպանում մօտենալով ինձ :

— « Ի՞նչ զէնքեր » ...

— « Այն զէնքերը, որ ստացաւ Ֆիրանեանը «Փակէ»-ի ընկերութեան միջոցով » :

— « Ինչի՞ տեղ էք դնում դուք ինձ », ասում եմ ես վշտացած...

— « Դու ի՞նչ ես, որ ինչի տեղ դնեմ քեզ, ասա', ի՞նչ արիւր զէնքերը », գոչում է Ստէկին՝ գրպանից դուրս քաշելով ատրճանակը :

— « Զգիտեմ » ...

Այս խօսքիս վրա Ստէկին բոլոր ուժով ատրճանակի կոթը իջնում է գլխիս եւ արիւնը առատութեամբ հոսելով, թափւում է աչքերս :

Ստէկին կկղած հեւհեւ նայում է ու ատամների միջից չչնջում.

« Բեզ ծեծի տակ Համբարի պէս կսպանեմ, եթէ չասես, թէ ինչ արիւր զէնքերը » ...

— « Համբարի պէ՞ս » ...

— « Այո', այո', ճիշդ ու ճիշդ Թովալ Համբարի պէս... Ահա՛ քեզ » : Ու ատրճանակի կոթով հարւածում է կողքերս :

— « Սպասեցէք » ...

— « Հը՞, ասա՛ » ...

— « Սպասեցէք մտածեմ » ...

— « Ա՛, ուրեմն գիտե՞ս, իրերդ հաւաքիր ու վար իջիր, վախկոտ չուն, այնտեղ ամէն բան կը պարզւի », ասում է Ստէկին, գոռոզութեամբ ելնելով :

Յանկարծ սիրտս ճմլւում է եւ ուզում եմ լաց լինել, բայց զարմանքով տեսնում եմ, որ Ստէկի տեղը կանգնած է Թովալ Համբարը.

— « Աս ի՞նչ խնդալիք բան է, տնաշէ՛ն », ասում է նա, ձեռնափայտին յենած հաստ ու ծուռ ոտքը շտկելով : Յետոյ մի լաւ դիտելով, թէ ես ինչպէս եմ լալիս, յանկարծ, խնդալու պէս պոռթկալով, երեք անգամ խորունկ, ցամաք ընդլնգում է — « հա՛, հա՛, հա՛ » ու գլուխն օրօրելով, ժպտալով, մեղմօրէն յարում է.

— « Մո՛ւխդ չմարի, մո՛ւխդ չմարի » ...

(Շարունակելի)